

福建通志

共壹百冊

總集拾捌冊

福建循吏傳卷八

明五

建寧府建安縣

王銳字允威洪武間爲山東新城教諭遷崇明知縣審驗人戶類分上中下三等定其徭役貢賦之法邑素少科第選諸生才敏者教之自是科第相望值旱蝻生祭八蜡卽雨遂有年累官副都御史從父瑛先爲崇明知縣徙建城郭創縣治定坊巷皆其力也

吳春永樂丙戌進士知婺源縣摧豪猾清獄訟均徭役民有逋租數年未輸春從容勸率未幾悉辦事隙輒至學舍與諸生講說飛蝗入境春引咎籲禱蝗悉赴水死

范僑字克高嘉靖初年三十餘授江都瓜步巡檢以捕盜功擢信陽主簿職貢事豪駟因緣爲奸市他簿率坐交通以敗僑獨修潔豪駟宿逋累巨萬僑疏以聞帝下所司誅諸奸秩滿調博羅益剛介自持以母老求歸養

楊棐字賓周嘉靖進士知峽江縣歷遷肇慶知府會粵中有羅旁之役督府令高要市馬百棐力爭之減十之九縣人轉餉日至山而罷棐曰至山萬一無護而爲馘必此輩也戒至河反令士自負之力裁浮冗歲省八千棐節用愛人未幾卒士民如喪所親喪歸奔送爲之罷市

張存義字宜甫嘉靖進士知番禺縣擢刑部主事出知惠州府時盜賊充斥水旱不時道殣相望存義捐俸及罰鍰市棺置亭中戒亭長曰有求卽施月課諸生親評文藝而高下之擢兩淮鹽運使以疾歸囊金不滿百

謝璿字天儀父勲字汝賢蚤孤事母孝謹流賊寇郡城突入其家勲挺身衛母被重創母竟免璿舉嘉靖鄉貢授懷寧教諭擢高州府石城知縣適廣東海寇猖獗上官檄往捕治璿率兵抵境賊望風遁殲其渠魁歲旱齋宿露禱三日遂雨是秋獲瑞禾一本九莖

林德卿字懋官父釗十歲喪父葬而廬墓雜作爲生以供母及弟母病足抱負出入二十餘年德卿嘉靖間歲貢生授登州訓導擢知博興縣奉父

戒以親民爲主邵陵王索賦急德卿條陳不可狀王怒逮繫之里老力爲請命王稱德卿爲鐵項閩子又條陳減博興清軍數御史爲疏請於朝尋以父老致仕監司宋某贈之白金謝不受

楊承禎字世興嘉靖間貢生爲興化府訓導擢知北流縣縣故有小河稅墻欲增之力爭不可且阻其委宮之擾狼狽兵常以調用爲苦承禎靜鎮之狼狽大服以不能媚上官拂衣歸子百朋字元重萬厯進士知合浦縣政寬大不苛值內官開採珠池供億殷繁百朋善調停民不爲病內官視守令蔑如百朋據禮不少屈以卓異擢戶部主事筦淮安閘裁罷日供金遷吉安知府

甌寧縣

黃瑞字叔祥洪武間以文學薦授南寧知府興學勸農民夷悅服父憂歸父老伏闕遞留詔服闋仍守南寧政聲益著及卒葬府治後民立祠祀之陳琪字良玉永樂初由監生除常州通判嘗部丁夫役天壽山會車駕臨帝怒下役不

力作予杖郡有豪猾官吏莫誰何琪繫至庭杖死之有富室周某者語人曰陳西衙杯茗款我願千金爲壽琪令移以修孟瀆河堤秩滿民詣闕保留進階奉直大夫涖政如故童承綸事繼母孝爲孫吏讀書不輟人笑曰何不讀律承綸曰讀律不讀書譬如屠子學操刀耳成化中官都昌典史捐俸賑民饑鄱陽大水承檄開濬湖工告成民祀之

謝純字梅岐正德舉人授海州知州倣造木牛流馬一鞭可行數十步居官清介海州人有包龍圖之誦忤巡按棄官歸弟昌字石屏官瓊州經歷署澄邁縣事值寇亂昌自督兵每行以一人持刀回顧者卽斬之須臾皆集賊洞以火攻之獲勝以憂歸築思親亭又置義倉以贍宗族

陳紀字仲理嘉靖進士知漢陽縣調鄞縣邑當倭衝文武大吏所至如織官私供億紀先期置廨舍內所需器用及米鹽零雜毫不擾民麻陽兵五百至令各攜豚首一紀曰城所割日幾豚而需首五百耶軍士請賦枯魚紀曰奉禁不得下海安所得魚乃以齎進又需騎五百紀曰邑故澤國官

籍馬僅四十焉得五百乃送屬代督府大憲軍餉者故需糗糧不受餼下
令簽富民運餉紀因謬爲好於帥以銀易之轉輸者皆得息肩入爲御史
以忤嚴嵩尋出爲廣東參議大帥妄殺邀功紀發其狀論罪厯淮陽按察
副使以父老乞歸

魏良臣字以忠隆慶進士知崇明縣邑有倭警民復相率爲奸設法平之
再補溧陽歲饑有易子食者捐俸倡賑民全活遷工部主事擢南寧知府
平土寇亂交趾入貢卻其例金又捐榷關之羨以備邊儲調鄖陽府會大
旱民洶洶將亂爲罷一切煩苛之令遷廣西按察司僉事領提學道卒

陳應熙字仲穆萬厯進士授潮州推官訊鞠論報迎刃而解擢戶部主事
權河西務中官撓政商賈不通應熙上狀置於法尋監兌湖歲大歉請易
漕粟爲折色於是得留粟數萬斛遷員外郎卒從子坊字鐘溪萬厯間郡
大水父柩在家乃懸於梁水大至抱柩不忍去與水出沒者連晝夜

任可爰字介臣萬厯舉人授廣州府龍門知縣罷牛鐵稅時山寇橫行躬

冒矢石破雁洋五指九連鬱洞劉洞諸寨還所掠男婦無算遷秩知州

建陽縣

江景成化中爲廣東長樂典史署興寧縣事流賊犯縣城景與民固守旣而大戰於水關口又戰於西門擁秀樓賊遁去

江龍字世霖嘉靖舉人授南寧通判遷左州知州以御史薦改知鬱林州苦積荒田租龍力爲申豁歲減二千有奇又革除斗級請係牛稅諸不便事再遷高州同知議足糧守要害禁鬻子正黃冊豁清勾六年當移調未及赴卒

崇安縣

方直字孟周洪武間諸生薦授萍鄉典史改豐城以廉能著稱召爲文淵閣纂修歷知海寧新鄉二縣用薦入爲御史以不避權貴復出爲新喻知縣

姚志字伯啓洪武間由監生爲束鹿知縣時屬兵後流移未復志課農桑

通商賈嚴戢猾胥雪冤婦凡三年治化大行秩滿邑人懇留再任

黃嘉賓字子揚父琮貢生治詩經授徒時遇晉江諸生趙恆於逆旅奇之知其困授以所受館悉召其徒從之恆曰僕所治春秋不習子經奈何琮代說經而以館金歸之恆撤館歸謂琮曰僕請爲君教子乃攜嘉賓入晉江就學恆後登第而嘉賓登嘉靖進士知常熟縣摘發如神輸賦者布縷雞豚皆以其便宜收納會捕沿海寇吳宗盟宗盟入賄於上官乃逮嘉賓輿論保持之得免邑有福山白茆港自弘治間豪家分據水利壅絕嘉賓圖疏濬之適邑豪結盜黨千餘私販鹽爲奸利久布賂有司莫之治嘉賓以計盡擒其黨語之曰汝輩法當死若爲我盡疏白茆者吾出汝罪衆喜且恐皆刻日受地河流復故旣事乃召其豪杖殺之而赦其子與黨尋擢戶部主事士民攀輿者如市一父老匍匐云少遭冤獄遇公得釋且泣且拜其爲主事督運大通橋稽察奸蠹益以嚴肅爲治一日暴卒或謂鹽豪之子陰酖之初趙恆過常熟聞杖殺鹽豪事就後堂答嘉賓二十曰旣革

化矣而何求多焉子其及矣至是果然孫世忠字屏周萬厯舉人授東陽教諭有教澤入爲翰林待詔遷刑部主事奉使南畿所至體卹驛傳使還遷郎中出知慶遠府署廣西按察副使值獐賊韋文義寇掠天河羅城諸邑世忠廣布威信勦撫兼施獐患遂平在官招集流亡萬餘戶免私差數千金尋致仕築抱甕園以居自號石圃老人

翁懋勲字瞻所萬厯間選貢生授賀縣知縣時山寇徐金柱據黑松峒肆掠前官爲備甚嚴懋勲撤守兵曰此皆吾民也從十餘人策馬入峒諭以恩信賊悉就撫峒患遂平歲旱捐俸賑饑新學舍以課士

浦城縣

張璫字孔圭成化舉人授贛州推官時汀韶寇侵贛境因以饑疫民死徙殆盡璫持檄走諸邑治其城池存徠周卹瑞金石城二縣故無城城自璫始屢請發帑以濟活者數萬人尤加意疑獄他郡獄未具者多移璫前後平反死刑四十餘人流以下者不可勝紀遷同知職清軍清軍御史某以

苛察繩下，獻抗言無隱。屢見牴牾，弗顧移疾疏發。三日遂行。

徐章字耀甫，弘治間以薦授江陵縣丞。累遷應天推官。中官吳太岳毆人致死，餽金求緩其獄。章不許。巨璫將中以蜚語，乃乞歸。子澍字南波，以薦授韶州通濟倉大使。並筦芙蓉驛。曲江有囚鬻女，左右請納之。弗許。縣吏索囚金，卒鬻之。澍爲言於邑令白，囚冤贖女，使與俱歸。改揭陽湖口巡檢。盜賊屏跡。澍母海氏，瑞之姑也。人謂澍不媿海氏甥云。

陳桓，正德進士，授戶部主事。歷郎中，出爲廬州知府。擢江西副使，備兵九江。居官清廉，歸家疏食布衣。他邑擬派驛傳於政和，桓貽書守令言：「政和民寡地瘠，而差役視諸縣獨繁，且偏受盜賊之衝。小民無計，方欲諸縣量爲津貼，乃諸縣轉以驛傳夫銀攤派，何以勝任乎？」守令如其言。邑人德之。張爵字允修，舉嘉靖鄉貢，授南昌通判。屬邑令多受糧長例金，恣其攬納諸花戶糧米爲利，迫催徵積逋，令釋糧長不問，而以逋賦責諸花戶。爵釐其弊，以糧長所逋責諸受金令，使償逮糧長積猾者斃之。杖令民皆自以。

糧輸官不得更立糧長民咸稱便遷台州同知倭寇逼郡城閉村落避賊者萬眾號呼城下爵開門納之且請於知府伏兵於隘以擊之乃督兵與倭戰於檢橋大敗之斬首百餘級自是倭相戒不敢入其境以積勞卒

李必昂字時望正德中以選貢生授雲南祿豐知縣歲饑請蠲賦邑人感之當道檄兼署羅次縣事擒劇賊楊泰又討平鳳姊索等並蒙朝賞先是賊蹂躪六縣一州祿豐城孤勢迫人無固志必昂勉以忠義悉力拒守賊數戰不利遁去擢知趙州調劍州以母老乞歸

吳年字子齡以掾爲文昌縣丞以清介著暹羅國有舟漂至眾以爲盜年審詢之其國所舉士也齎糧送之歸再補樂清初至縣人以資易之久皆信服無何遷爲王官去

徐柏字守卿嘉靖進士授戶部主事筦通州德州二倉值米價涌貴令輸者納緡俟價稍損則轉糴充庾官民兩便之歷郎中徐沛河決工部尙書朱衡知其能移咨擢用柏贊襄疏濬分署六年出知廉州府初至官一老

奴肩行李一短僮隨之伺迎者麇集郵亭不知其守也及擢湖廣按察副使以去襜被外無餘物謝於眾曰吾向者固一肩來也至湖廣值張居正當國子弟奪民產搆訟柏斷給半價既又求倉場官地柏不許巡撫某希指中之考滿逾四年始就遷參政甫匝月左遷四川副使益自淬厲巡按虞養涖方論薦竟拂衣歸其後王之垣以邊才薦張天德以遺逸舉皆不起

張尙禮字德亨萬厯初由工部吏授定南典史時安遠巨盜葉楷盤踞黃鄉流劫江廣間尙禮奉檄追捕堵隘口鼓鄉勇招降以孤賊勢不半年賊平時議就安遠會昌間添設長寧縣復檄督城工八閱月而工竣餘寇乘釁來攻尙禮專任征剿悉就擒尋以老乞歸

徐萬仞字抑之萬厯進士授金華推官以廉平著遷荊州同知郡有門攤役凡行齎居送皆取給民間萬仞爲設九等法令民季出金吏自辦之擢戶部郎中出知歸德府罷門稅農民例金數千以贖鍰佐諸邑備邊餉無

重賦民郡三面距黃河又沙河沁河白河清河皆經行其地萬仞相度地勢築河防三十餘處保全者數萬家卒於官當道賻之始歸櫬

吳鍾英字邦彥父文贊字景皋以諸生入監授廣安州州同攝州事川東妖賊起募善射者發連珠弩殺渠魁二十餘人餘黨宵遁鍾英萬厯舉人知松陽縣松陽故山邑窪窪錯出前官爲築堰以防潦費至千金潦猝不能禦堰遽壞鍾英議罷之開礦者數百人皆仰食於官得不償失無賴少年至掘冢發屋盜乘之起鍾英力請當道罷其役徵輸多加耗鍾英分毫無所取相勸輸積逋爲清方奏最卒於官鍾英未仕時喜爲德於鄉邑中待哺者常數十家立義冢城南白鴿山又創義田以給宗人之貧者

松溪縣

董良敬字慎甫洪武中以貢生爲浦城典史縣有疑獄事涉豪貴知縣不能決一日再鞫召典史令坐於旁良敬出數語折之兩造愕然知縣乃投筆使爲讞詞良敬應手成竟坐豪貴法知縣欲少爲周旋良敬抗聲曰今

日之判眾目共覩禍則典史當之不可更一字也後擢爲御史

政和縣

吳瑾字士瑜以貢生授常州推官臨囚訊問務以誠感令自引咎不事拷掠在官六年獄訟幾息再考以疾卒於京師

壽寧縣

陶欽字希稷嘉靖間歲貢生除永嘉縣丞時張璫爲相建第命欽董其事璫蒼頭頗張威福欽執而笞之郡縣官皆懼欽曰相公乃天下宰衡下官乃永嘉父母何得任僕虐民耶尋調處州府景寧

葉時宣嘉靖中貢生除泗州訓導如皋有寇警知縣徵餉於民民難之謀於時宣時宣擇諸生中練達者轉諭民曰非斂民也第儲以防寇寇不至皆民物寇至民亦烏能有哉皆踴躍從命以卻寇功遷泰州學正進安慶府教授

葉朝鎮字安之天啓中歲貢生授歸安主簿轉曲江縣丞擢惠來知縣有

囚張寶等二十餘人皆冤爲直之請豁圖籍數千戶立三華山鎮以靖山
寇又力剿海盜朱良保以憂去官

福建循吏傳卷九

明六

邵武府邵武縣

譔賤生洪武中以貢生授岳池典史與令王佐述至京坐事下獄岳池耆老詣闕訴二人廉介且役均民安帝命勘問果如所訴遂賜衣韉筵宴復其官尋用薦擢四川按察司僉事列名彰善錄

朱祐字逢吉永樂間以貢授兵部職方主事著廉能聲改紹興府通判凡便民者必力爲之歲大饑不待請發倉賑民秩滿士民上章請畱又七年乃去尙書郭璉薦知漢陽府郡舊無廩庾軍民渡江輸於武昌數患覆溺祐請立倉府城正統十二年紹興父老詣京乞除祐守本郡比至而祐已歸

周灝字秉純景泰舉人知海鹽縣爲政持大體而善摘奸覆有吏劉淵者巧於弄法致產數千金灝按治之民有因貧背婚轉字豪族者訴於灝

助之金令成婚豪不敢爭邑苦徭稅灝議均賦法遂減其半會入計有署
邑者失其庫藏倉皇不能白獨懲監守者灝閱宿單有直獄黃廣者召鞫
之立吐遂坐之署者問故灝曰余詢問時有犬母子交口而觸其席二犬
交口者獄也子凌母者獄卒也犬觸席者廣也適閱單得黃廣果得之人
服其神灝存心平恕獄有冤者輒釋之有不可釋者或縱使歸家與之約
無不應期自至守有不便於民諍弗顧擢松江同知未上卒曾孫清字世
亨萬厯間以掾除永興典史裁革里甲諸供應歲省民錢千緡知縣他出
委以縣事有富室欲文致人罪以雪怨賄清清不聽山寇甯虎七劫掠清
出奇策捕獲之邑境以平

謝祖嘉靖中貢生官連州訓導遷沔陽州學正署州事會寇起祖悉力捍
禦境賴以安擢藍山知縣潔已愛民未幾乞歸御史馬象乾出其門巡按
至郡數造其廬絕口不道官府事

徐美字忠甫嘉靖舉人知連州廉勤有幹決積牘減征徭舊例鹽課及他